

CHICHO KOCK A BIRA REY DI TUMBA DURANTE AMBIENTE FORMIDABLE

ORANJESTAD(AAN)— Bao di awacero, cu miles di paraplu den stadion di RCA, Chicho Kock e aña aki a logra conquista e titula tan anhela pa tumbenonan di Aruba, esta Rey di tumba.

Chicho Kock diavierna anochi tabata e cantante cu tabata tin mas tanto fanatico den RCA sigur compara cu e otro cantantenan, y e expectativa tabata grandi cu e aña aki si e lo a conquista e titulo aki, locual a sosode tambe cu su "Burachi 'n ta conta", composita pa su persona y Didi Wernet, y aregla manera ta custumber pa Hildward Croes.

Iyvi Gonzalez a haci un debut basta bon, pero despues Boysie Croes y Francis Croes, no por a logra hisa e animonan manera debe ser y por bisa cu Boysie tabata mas debil e aña aki.

Isnardo Farro a cosecha exito cu su 'Vitamina' cu tabata un bunita tumba. Angel Giron, no a logra pega su "Non Stop", ni Henry Kock ni Win Winklaar no a logra hisa e animonan tampoco, apesar cu Henry tabata tin un bon presentacion un biaha mas den e concurso aki.

Super Estrella Original a presenta cu un ritmo candente di tumbaa la Curacao, pero ningun di nan no a logra sobresali apesar cu Maikel Rafael a haci un bon papel.

Di Vibracion Musical, Tabata solamente Chinto Croes cu a pega un bon tumba ayera anochi, y cu su Okey Goze, e porta a ser habri pa e ambiente.

E explosion a bini cu La Combinacion perfecta ora cu Oswald Ras a lanta publico cu su "Den Swing" di warm up". Aki por bisa cu e concurso a cuminsa di verdad pa locual ta ambiente.

Sylvanio Maduro, y Edwin Croes a sigui tene e publico calenta te cu Oswald a remata cu su "Bon bini un biaha mas".

Mylene Marquez como e unico dama y debutan-

do diavierna anochi cu Latin four & Company a duna un presentacion tremendo y a termina tambe cu e premiacion di 'rookie di aña'.

Di agrupacion TIME, Alejandro Koeiman tabata poco debil, pero Skere Arends' cu su Pen Bieuw i lanta e animo atrobe cu un presentacion masha satisfactorio.

Despues di esaki e publico a bira manera loco ora cu Chicho Kock a sona su "Burachi 'n ta conta".

Despues di a pone tur hende bao di impresion cu e lo gana e concurso cu su tumba e aña aki, a para bira cu e otronan cu a sigui mester a mula fuerte.

Romeo Croes, cu Sensacion del Caribe no tabata tin un tumba acogedor, pero den tur e awacero cu a cay, Rafael Flanders a laga tur hende sa cu e ta conta den tumba di Aruba y Didi Wernet cu a muestra un progreso grandi tambe e muestra cu e ta na caminda pa bira rey pronto.

Triple S a presenta cu John Jeandor cu un bon tumba di Casin, pero no suficiente fuerte pa ta den finalistanan.

ERick Rafael cu su penchi den carnaval no a impone tampoco.

A sigui Ito Dania cu su "Heey heey" y esaki si a resona den stadion di RCA y e duda a dreña den hopi hende cu tabata tin impresion cu e titulo lo bay pa Chicho. Despues di a scucha Ito hopi a cuminsa duda.

E duda a bira mas grandi cu e "Jangue Jangue" di Casin Giel, cual tumba sin duda mester tabata entre e mihornan di e anochi.

Doedel Sofia tambe a presenta fuerte cu su "Labado" cual tambe a cay den e finalistanan.

E ultimo agrupacion tabata di La Revolucion Latina. Secundino Tromp a muestra e publico cu e a sigui conta den e concurso aki, y cu pronto su dia

lo yega tambe.

Martin Quandus sinembargo no tabata di e fuerte ey e aña aki. No por a mira un tumba ganador den su "toro lenga afo" pero Mario Steenen cu a cera e anochi si a demostra cu e tambe ta na caminda pa corona, cual paso el a impone aña pasa caba.

E ambiente tabata formidable den RCA y cu awacero e publico a disfruta un mundo. Miles di paraplu tabata tin y e aprecio a bay pa un grudo cu a pone nan paraplu disponibel na miembroman di jurado pa e concurso por a sigui sin interrupcion.



DOEDEL SOFIA a termina na di 5 lugar y ta su bendito. E aña aki el a sobresali cu su "E lbadó".




OSWALD RAS cu a cuminsa e explosion e aña aki den RCA. El a termina na di 4 lugar cu su "Bon bini un biaha mas".

E GANADORNAN DI TUMBA E AÑA AKI



CHICHO KOCK
Rey di tumba 1985 cu su "Burachi 'n ta conta".



CASIN GIEL rey di tumba 1971, tur aña fuerte competidor y finalista despues, y e aña aki na di 3 lugar cu "Jangué Jangué."



MYLENE MARQUEZ a conquista e premio di Rookie di aña cu su presentacion di "Ay jay, Jay mi tey."



ITO DANIA
Rey di tumba 82 y 83 y e aña aki Runnerup cu su "Heey Heey".



Sr. Leo Tromp director di Instituto di Cultura ta entrega e trofeo rotativo na Chicho Kock, rey di tumba 85.